

Broj: 13/08-03-SI/24
Sarajevo, 16.12.2024. godine

1. Pitanje:

Da li se na prihode ostvarene po osnovu naknade štete u slučaju elementarnih nepogoda plaća porez na dohodak?

Odgovor:

Ne, jer se u skladu sa Zakonom o porezu na dohodak, prihodi ostvareni po osnovu naknada štete u slučaju elementarnih nepogoda ne smatraju dohotkom.

2. Pitanje

Da li je obveznik koji prvi put počinje sa obavljanjem djelatnosti obavezan podnijeti prijavu za plaćanje akontacije poreza na dobit za prvu godinu poslovanja?

Odgovor:

Obveznik koji tek prvi put počinje sa poslovanjem nije dužan podnijeti prijavu za plaćanje akontacije poreza na dobit za prvu godinu poslovanja.

3. Pitanje:

U kom se periodu može podnijeti Zahtjev za povrat preplaćene obaveze poreza na dobit?

Odgovor:

Zahtjev za povrat preplaćene obaveze poreza na dobit može se podnijeti u roku od 3 godine od dana uplate porezne obaveze.

4. Pitanje

Da li se preplate poreza na dobit mogu prenositi u akontacije za sljedeću godinu?

Odgovor:

Preplaćeni iznosi poreza na dobit mogu se koristiti za akontacije u narednom periodu.

5. Pitanje:

Koji se uslovi trebaju ispuniti da bi se ostvario povrat više uplaćenog poreza na dobit?

Odgovor:

Porezni obveznik (pravno lice) ima pravo na povrat više ili pogrešno plaćenog poreza u slučaju kada su ispunjeni sljedeći uvjeti:

- da porezni obveznik nema duga po drugim vrstama prihoda;
- da porezni obveznik podnese zahtjev za povrat više ili pogrešno plaćenog poreza;

- da je zahtjev podnesen u roku od tri godine od dana uplate porezne obveze.

6. Pitanje:

Da li se može izvršiti preknjižavanje pretplate sa jedne vrste prihoda na drugu vrstu prihoda u okviru istog poreskog obveznika?

Odgovor:

Može, pod uslovom da je isti depozitni račun i za jednu i za drugu vrstu prihoda.

7. Pitanje:

Da li se na prijenos vlasništva na nekretnini između braće i sestara plaća porez na promet nepokretnosti?

Odgovor:

Nasljednici, odnosno poklonoprimci braća i sestre oslobođeni su plaćanja poreza na promet nepokretnosti, ali pod uslovom da se ta nepokretnost ne može otuđiti u roku od tri godine.

8. Pitanje:

Da li se mora plaćati porez za uplate koje dolaze iz inostranstva a idu preko paypal -a? Ako da, da li se toleriše određeni iznos ili se mora plaćati porez na sve iznose koje se uplate putem paypal-a?

Odgovor:

Sve uplate koje dolaze iz inostranstva a idu preko paypal -a oporezive su u skladu sa Zakonom o porezu na dohodak.

Po primitku dohotka iz inostranstva, fizičko lice – rezident FBiH, sam, od ukupnog prihoda, obračunava 4% doprinosa za zdravstveno osiguranje. Tako izračunati iznos doprinosa se potom oduzme od ukupnog prihoda, te se time dobije osnovica za obračun poreza na dohodak (10%). Plaćanje obaveza vrši se isti ili najkasnije naredni dan po primitku dohotka iz inostranstva, a prijavljivanje vrši se u roku od 5 (pet) dana od dana primitka dohotka putem prijave Obrazac AMS-1035-Akontacija poreza po odbitku na druge samostalne djelatnosti na prihod iz inostranstva.

Godišnje prijavljivanje vrši se do 31. marta tekuće godine za prethodnu godinu, putem prijave Obrazac GPD-1051-Godišnja prijava poreza na dohodak.

Obrasci se podnose nadležnoj poreznoj ispostavi prema mjestu prebivališta fizičkog lica.

9. Pitanje:

U kom je roku fizičko lice - samostalni poduzetnik dužan pokrenuti postupak registracije i dobivanja ID broja?

Odgovor:

Fizičko lice - samostalni poduzetnik dužan je pokrenuti postupak registracije i dobivanja ID broja u roku od 5 radnih dana od dana registracije kod nadležnog registracijskog organa podnošenjem prijave - Obrasca POR-503 nadležnoj organizacionoj jedinici Porezne uprave gdje se nalazi sjedište tog fizičkog lica.

10. Pitanje:

Koju dokumentaciju Fizičko lice - samostalni poduzetnik treba podnijeti uz Obrazac POR-503 u svrhu porezne registracije i dobivanja ID broja?

Odgovor:

Fizičko lice - samostalni poduzetnik uz Obrazac POR-503 dostavlja sljedeću dokumentaciju:

- a) dokument izdat od nadležnog registracijskog organa kojim se potvrđuje osnivanje (kopija uz original na uvid),
- b) ugovor o vođenju računovodstvenih poslova samo u slučaju kada poslovne knjige vodi drugo pravno ili fizičko lice i kad postoji obaveza vođenja poslovnih knjiga (ovjerena kopija ili original),
- c) dokaz o pravnom osnovu korištenja poslovnog prostora (ovjerena kopija ili original),
- d) identifikacioni dokument podnosioca zahtjeva (na uvid) ili punomoć za podnošenje obrasca za punomoćnika (original ili ovjerena kopija).

11. Pitanje:

Da li je potrebno prijaviti promjenu adrese na kojoj je registrovan obrt ukoliko je došlo do promjene naziva ulice ili broja adrese i na koji način?

Odgovor:

Ukoliko je došlo do promjene naziva ulice ili broja adrese gdje je registrovan obrt, potrebno je Kantonalnom poreznom uredu – Odsjeku za edukaciju i registraciju dostaviti popunjen obrazac POR-503 uz koji je potrebno priložiti Rješenje nadležnog registarskog organa (kopija uz original na uvid) kojim su ti podaci izmijenjeni.

12. Pitanje:

Želim da prodam stan u kome živim, a koji sam stekla prije nepune 3 godine. Da li moram platiti porez?

Odgovor:

Ne oporezuje se dohodak ostvaren prodajom nekretnina koje su do otuđenja služile za stanovanje poreznog obveznika i/ili uzdržavanih članova njegove uže porodice, kao ni dohodak ostvaren otuđenjem nekretnina nakon tri godine od dana sticanja tih nekretnina.

13. Pitanje:

Koju dokumentaciju je potrebno priložiti u svrhu promjene prezimena i adrese na poreznoj kartici?

Odgovor:

Promjene na poreznoj kartici Porezna uprava upisuje na osnovu podnesenog zahtjeva, priložene odgovarajuće vjerodostojne dokumentacije i ranije izdate porezne kartice.

Zahtjev za izmjenu podnosite nadležnoj poreznoj ispostavi prema mjestu Vašeg prebivališta na istom obrascu Zahtjeva za izdavanje porezne kartice (Obrazac –

PK 1001) u kojem ćete u odgovarajućem polju označiti da se radi o „izmjeni“. Uz Zahtjev dostavljate dokumente na osnovu kojeg je izvršena promjena podataka (npr. vjenčani list) i kopiju novog CIPS-a –obavještenja o prebivalištu. Uz Zahtjev (Obrazac – PK 1001) za izmjenu podataka na poreznoj kartici, potrebno je priložiti original Poreznu karticu.

14. Pitanje:

Sjedište poslodavca je Federaciji BiH, a moje prebivalište u Republici Srpskoj. Gdje predajem Zahtjev za poreznu karticu?

Odgovor:

Zahtjev za izdavanje porezne kartice (Obrazac – PK 1001) predajete nadležnoj poreznoj ispostavi prema sjedištu poslodavca.

15. Pitanje:

Koje dokumente je potrebno predati za izdavanje potvrde o rezidentnosti fizičkih lica?

Odgovor:

Zahtjev za izdavanje potvrde o rezidentnosti fizička lica predaju na Obrascu ZCOR-101. Uz Zahtjev lice dostavlja i sljedeće dokumente:

- Godišnju prijavu poreza na dohodak (Obrazac GPD-1051) ukoliko istu već niste dostavili Poreznoj upravi za prethodni porezni period u odnosu na porezni period koji je naveden u Zahtjevu ili za porezni period koji je naveden u Zahtjevu, a koji je istekao;
- Potvrdu o plaćenom porezu u inostranstvu za dohodak (npr. penzije, naknade za ishranu u toku rada, prevoz i sl.) koji nije oporeziv prema Zakonu o porezu na dohodak, ukoliko je takav dohodak ostvaren i/ili oporezovan u inostranstvu u prethodnom poreznom periodu u odnosu na porezni period koji je naveden u Zahtjevu ili za porezni period koji je naveden u Zahtjevu, a koji je istekao;
- kopiju lične karte (ili ekvivalenta) ili pasoša na kojem je navedena adresa prebivališta ili boravišta, u slučaju kad lice ima dvojno državljanstvo druge države;
- Ugovor o radu ili ekvivalent tom ugovoru ukoliko podnosilac Zahtjeva ima poslodavca van teritorije BiH, a koji je važio ili važi u periodu za koji se podnosi Zahtjev;
- popunjen Upitnik za utvrđivanje rezidentnosti (Obrazac UCOR-105) podnosilac Zahtjeva dostavlja u slučaju kada ima dvojno državljanstvo ili ima zasnovan radni/poslovni odnos sa poslodavcem u inostranstvu gdje i obavlja rad, ili mu je supružnik ili partner u inostranstvu.

16. Pitanje:

Koju osnovicu za obračun doprinosa treba da primjenjuje preduzetnik registrovan za obavljanje djelatnosti - savjetovanje u vezi računara u 2024. godini?

Odgovor:

Djelatnost savjetovanje u vezi računara spada u djelatnosti slobodnih zanimanja i na osnovu objavljenih Osnovica za obračun doprinosa određenih obveznika za 2024. godinu iznosi 2133,00 KM.

17. Pitanje:

Koji obrazac se podnosi za prijavu poreza na primanja za članove nadzornog odbora?

Odgovor:

Za prijavu poreza na primanja za članove nadzornog odbora podnosi se obrazac ASD-1032, akontacija poreza po odbitku na prihod od drugih samostalnih djelatnosti.

18. Pitanje:

Ukoliko fizičko lice izdaje poslovni prostor pravnom licu da li je potrebno obavijestiti Poreznu upravu (Kanton Sarajevo)?

Odgovor:

U skladu sa članom 38. Zakona o porezu na dohodak propisana je obaveza poreznog obveznika koji izdaje u zakup svoju nepokretnu imovinu da u roku od osam dana od početka iznajmljivanja izvrši prijavu istog nadležnoj jedinici Porezne uprave.

19. Pitanje:

Koje su porezne obaveze fizičkog lica koje izdaje poslovni prostor?

Odgovor:

Fizičko lice, vlasnik nekretnine koja se nalazi na području Federacije BiH, ukoliko istu daje u zakup, obveznik je poreza na dohodak od imovine. Porez na dohodak plaća se po stopi od 10%, uz mogućnost priznavanja rashoda u iznosu stvarnih troškova ili procentualnog priznavanja rashoda (u iznosu od 30% prihoda ostvarenog od iznajmljivanja nepokretne imovine).

Pored obaveze obračuna, plaćanja i prijave poreza na dohodak, propisana je i obaveza obračuna i plaćanja poreza na imovinu, što je regulisano kantonalnim propisima o porezu na imovinu za svaki kanton.

20. Pitanje:

Koji je rok za uplatu poreza na dohodak koji se ostvaruje naplatom najamnine i koji obrazac se podnosi?

Odgovor:

Akontacija poreza na dohodak od imovine koji se ostvaruje naplatom najamnine i zakupnine plaća se mjesečno (do 15. u mjesecu za protekli mjesec) u visini 1/12 od godišnjeg iznosa utvrđenog za prethodni porezni period na osnovu prijave poreznog obveznika.

Akontaciju poreza na dohodak po osnovu iznajmljivanja nepokretne imovine poreznik obveznik utvrđuje kroz obrazac PRIM-1054 koji podnosi uz svoju godišnju prijavu poreza na dohodak (obrazac GPD-1051).

21. Pitanje:

Gdje se plaća porez na dohodak od iznajmljivanja imovine?

Odgovor:

Porez na dohodak od imovine plaća se prema mjestu gdje se nepokretna imovina nalazi, a za pokretnu imovinu mjesto plaćanja je prema mjestu registracije samostalne djelatnosti, odnosno prebivališta poreznog obveznika.